



Discussion générale

► **M. Léon Gloden** (CSV).- Merci, Här President. Ech soen dem Rapporteur Merci fir säi schrëftlechen a mëndleche Rapport. Mir stëmmen haut am Fong e Projet de loi, dee parallel ass zu dem Projet de loi iwwert d'kommerziell Gesellschaften, déi jo och méi laang Zäit kréien, fir hir Konten ze deposéieren. An ech ginn domadder den Accord vun der CSV.

► **M. Fernand Etgen**, *Président*.- Merci villmools, Här Gloden.

An dann ass et elo un der honorabler Madamm Simone Beissel. Madamm Beissel, Dir hutt d'Wuert.

► **Mme Simone Beissel** (DP).- Merci, Här President. Ech profitéiere vun dem kuerze Wee, fir hei op déi flott Tribün ze kommen.

Här President, léif Kolleeginnen a Kolleegen, fir d'éischt wëll ech dem Mars Di Bartolomeo häerzlech Merci soe fir säi gudder schrëftlechen a mëndleche Rapport. An ech wëll em extra Merci soen, och der Madamm Closener, well si hu wierklech d'Rad geschloen, fir an enger extreem schneller Vitess dësen technesche Rapport hinzekréien, am Interessi vun de Lëtzebuerger politesche Parteien.

Dir wësst alleguerten, dass d'Parteiefinanzéierungs-gesetz vun 2007 zwar „a fait de l'ordre dans la boutique“, dat heescht, équilibréiert an transparent d'Finanzéierung vun de Parteien erlaabt huet an agefouert huet, mee parallel dozou och streng a formalistesche Konditiounen, déi d'Partei mussen erfëllen, fir eeben an de Genoss vun där Finanzéierung ze kommen.

An do derbäi ass eng vun den Haaptkonditiounen, dass d'Konten an d'Donateurslëschte vum Joer virdu mussen virun dem 1. Juli vum lafende Joer era si bei den zustännegen Instanzen. Dat war also fir dëst Joer den 1. Juli 2020 fir d'Konte vun 2019.

Wéi et schonn ugeklongen ass vum Rapporteur, ass et duerch d'Covid-19-Kris awer esou, dass d'Parteien duerch dës legal Obligatiouner riskéieren, ferm an d'Labrängen ze kommen, éischtens kontabelsméisseg an zweetens haapt-sächlech, well déi statutaresh Kongresser net kënnen stattfannen, wou déi Konten da géifen agreéiert ginn, wéi dat néideg ass.

Dofir ass et ganz wichteg, dass dëse Projet de loi den Delai verlängert, dat heescht, genuch Deeg hannert dem deklaréierten Enn vun dem État de crise bréngt. An dee Moment kënnen d'Partei regulär hir Konten an Donateurslëschten eraginn an dann ass dat an der Rei. Ech mengen, déi grouss Plus-value vun dësem Projet ass d'Rechtssécherheet, déi dës Prolongatioun bréngt. An dofir ass et normal, dass mir dat all begrëssen, an ech bréngen och dofir den Accord vun der DP-Fraktioun.

Villmools merci!

► **Une voix**.- Très bien!

► **M. Fernand Etgen**, *Président*.- Merci villmools, Madamm Beissel.

An da kritt d'Wuert déi honorabel Madamm Josée Lorsché.

► **Mme Josée Lorsché** (déi gréng).- Villmools merci, Här President. Ech bleiwen op der Plaz. Ech wëllt mengem neien Noper a Rapporteur vum Projet de loi e grouss Merci ausdrécke fir seng gutt Erklärungen vum Dräi-Zeile-Gesetz, wéi een et scho bal kann nennen, a ginn natierlech den Accord vun der grénger Fraktioun.

► **M. Fernand Etgen**, *Président*.- Merci villmools, Madamm Lorsché.

An da wier et um honorabelen Här Roy Reding. Här Reding, Dir hutt d'Wuert.

► **M. Roy Reding** (ADR).- Merci, Här President. Och mir felicitéieren dem Mars Di Bartolomeo fir en extreem prezise Rapport. Ech

fannen ëmmer, e Rapport, wann s de en héieren hues an du hues alles verstanen, da war en exzellent. A selbstverständlech fënnt dëst Gesetz d'Zoustëmmung vun der ADR. Merci.

► **M. Fernand Etgen**, *Président*.- Merci villmools, Här Reding.

An da kritt d'Wuert den honorabelen Här Marc Baum.

► **M. Marc Baum** (déi Lénk).- Merci, Här President. Mir stëmmen dësem Gesetz natierlech och zou, gi just ze bedenken, datt mer eis Zoustëmmung ginn an der Hoffnung, datt dann déi ordinär Kongresser vun de Parteien kënnen stattfanne virun och deem verlängerten Delai, wat net onbedéngt am Moment ginn ass, wou een dann eventuell nach eng Kéier misst un den Text erugeen oder alternativ Forme fannen. Et ass e gudden Text, deen am Moment néideg ass. Mir stëmmen e mat.

► **M. Fernand Etgen**, *Président*.- Merci villmools, Här Baum.

Leschten ageschriwwene Riedner ass den honorabelen Här Sven Clement.

► **M. Sven Clement** (Piraten).- Merci, Här President. Och vu mir e Merci un de Mars Di Bartolomeo fir dëse Rapport vun engem ganz kuerzen an technesche Gesetz.

Ech wollt d'Geleeënheet kuerz notzen, fir drun ze erënneren, datt mer am Dezember eréischt, am Dezember d'lescht Joer, et si fënnf Méint hier an et gesäit awer esou laang aus, méi streng Reegele fir d'Parteiefinanzéierung gestëmmt hunn. Mir hunn hei, besser gesot am Chambersgebaai, méi streng Reegele gestëmmt. An elo mierke mer, well mer de Covid-19 net konnte virausgesinn, datt mer eis do selwer e bëssen an en Eck manövréiert hunn. An deementsprechend ass dat heite just eng temporär Mesure, déi un eng temporär Situatioun gebonnen ass. A fir déi ze behiewen, gi mir och eisen Accord.

► **M. Fernand Etgen**, *Président*.- Merci villmools, Här Clement.

D'Regierung huet d'Wuert, de Premier- a Staatsminister Xavier Bettel.

Prise de position du Gouvernement

► **M. Xavier Bettel**, *Premier Ministre, Ministre d'État*.- Här President, fir d'éischt wëll ech dem Här Di Bartolomeo Merci soe fir säi schrëftlechen a säi mëndleche Rapport an der Madamm Beissel fir hire mëndleche Rapport.

(Brouhaha)

Ech mengen, déi meescht vun eis heibanne wëssen, wéi wichteg et ass, dass mir och als Parteien eis un d'Reegelen halen, déi mer definéieren. An déi meescht vun lech a mir wëssen et och alleguerten: De „Bleift doheim!“ zielt och fir d'Parteimemberen. Dat heescht, dass keng Kongresser organiséiert ginn. An dofir ass et och wichteg, dass d'Parteien awer konform zum Gesetz sinn, fir dass d'Parteiefinanzéierung och kann applikabel sinn. An dofir freeën ech mech iwwert d'Zoustëmmung.

► **M. Fernand Etgen**, *Président*.- Merci villmools, Här Staatsminister.

Da kënnen mer zur Ofstëmmung kommen iwwert de Projet de loi 7550. Den Text steet am Document parlementaire 7550².

Vote sur l'ensemble du projet de loi 7550 et dispense du second vote constitutionnel

Fir d'éischt déi perséinlech Stëmmen iwwert den elektronische Wee. D'Ofstëmmen fänkt un.

De Quorum ass erreecht.

Wien e Vote par procuration wëllt ofginn, dee soll d'Hand an d'Luucht hiewen!

Appel nominal (votes par procuration)

Domadder ass dëse Projet eestëmmeg mat 60 Jo-Stëmmen ugeholl.

Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen, Paul Galles, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Georges Mïscho, Mme Octavie Modert, M. Laurent Mosar, Mme Viviane Reding, MM. Gilles Roth, Marco Schank, Marc Spautz, Serge Wilmes (par M. Léon Gloden), Claude Wiseler et Michel Wolter (par Mme Martine Hansen) ;

MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer ;

Mme Simone Asselborn-Bintz, M. Dan Biancalana, Mmes Tess Burton, Francine Closener (par M. Georges Engel), MM. Yves Cruchten, Mars Di Bartolomeo, Georges Engel, Claude Haagen, Mmes Cécile Hemmen et Lydia Mutsch (par M. Claude Haagen) ;

Mme Semiray Ahmedova, MM. Carlo Back, François Benoy, Mmes Djuna Bernard, Stéphanie Empain, Chantal Gary, M. Marc Hansen (par Mme Josée Lorsché), Mme Josée Lorsché et M. Charles Margue ;

MM. Jeff Engelen, Gast Gibéryen (par M. Fernand Kartheiser), Fernand Kartheiser et Roy Reding ;

MM. Sven Clement et Marc Goergen ;

MM. Marc Baum et David Wagner.

Freet d'Chamber d'Dispens vum zweete Vote constitutionnel?

(Assentiment)

Dann ass et esou decidéiert.

18. 7545 - Projet de loi visant à mettre en place un régime de garantie en faveur de l'économie luxembourgeoise dans le cadre de la pandémie Covid-19 (suite)

An da freet d'Madamm Lydie Polfer nach eng Kéier d'Wuert.

► **Mme Lydie Polfer** (DP).- Ech froen d'Wuert, fir mech ze entschëlegen. Ech hu vir-drun am Äifer eng Motioun deposéiert, wou ech och nach ëmmer ganz houfreg drop sinn, awer ech hunn déi net nëmmen eleng deposéiert, mee ech hunn déi zesumme mam Här Laurent Mosar deposéiert. An ech hat vergiess, dat ...

► **Plusieurs voix**.- A!

► **Mme Lydie Polfer** (DP).- ... awer ze soen.

(Brouhaha)

An ech wollt dat nohuelen, well dat ass mer ganz wichteg. Dir hutt se elo. An da kënnen mer muer jo nach driwwer schwätzen.

Merci.

► **Plusieurs voix**.- Très bien!

► **M. Fernand Etgen**, *Président*.- Merci villmools, Madamm Polfer, fir déi Prezisioun.

19. 7546 - Projet de loi relative aux mesures temporaires dans les secteurs de l'électricité et du gaz naturel dans le cadre de la lutte contre le Covid-19 et modifiant la loi modifiée du 1^{er} août 2007 relative à l'organisation du marché du gaz naturel

De leschte Punkt vum Ordre du jour ass de Projet de loi 7546 iwwert d'temporär Mesurë fir de Secteur vum Elektreschen a fir dee vum Gas am Kader vum Kampf géint de Covid-19. D'Riedezäit ass nom Basismodell festgeluecht. An ech géif direkt d'Wuert ginn un de Rapporteur vun dësem Projet de loi, den honorabelen Här François Benoy. Här Benoy, Dir hutt d'Wuert.

Rapport de la Commission de l'Environnement, du Climat, de l'Énergie et de l'Aménagement du territoire

► **M. François Benoy** (déi gréng), *rapporteur*.- Merci, Här President. Här President, Dir Dammen an Hären, wéinst der Covid-19-Pandemie an de Mesuren, déi zu Lëtzebuerg geholl goufe fir d'Gesondheet vun der Populatioun, mussen mer e puer Upassungen am Stroum- an am Gasgesetz maachen, wat mir mam Gesetzesprojet 7546 maachen, deen ech lech elo hei presentéieren.

Duerch d'Limitatioun vun de Kontakter kënnen och am Gas- an am Stroumsector net alleguerten d'Fristen, déi de Gesetzgeber virgesinn hat, agehale ginn. An dofir maache mer elo e puer Upassungen an de Gesetzter.

An et geet hei ëm dräi Punkten :

- éischtens kritt de Regulateur, den ILR, d'Méiglechkeet, d'Validitéit vum Fournisseur par défaut vum Stroum ëm sechs Méint nom Schluss vum État de crise ze verlängeren;

- zweetens kréien d'Gestionnaire vum Gasseau bis den 31. Dezember 2021 Zäit, fir 90 % vun de Compteuren duerch intelligent Comp-teuren ze ersetzen, an

- drëttens kréien d'Gas- an d'Stroumfournisseure bis den 31. Mee Zäit, fir dem Energie-minister matzedeelen, wéi vill Energie si dat lescht Joer agespuert hunn.

Zesumme mam Energieminister hu mir de Gesetzesprojet de 27. Mäerz eng éischte Kéier an der Kommissioun duerchgeholl. Den Avis vum Staatsrot an déi vun de Chambre-profession-nellen hu mer den 9. Abrëll diskutéiert an dunn och de schrëftleche Rapport ugeholl.

Här President, Dir Dammen an Hären, wéi scho gesot, geet et am Gesetzesprojet drëm, fir eng Rei Ännerungen wéinst dem Covid-19 am Stroum- a Gasgesetz ze maachen. De Regulateur, also den Institut luxembourgeois de régulation, den ILR, leet all dräi Joer, ëmmer fir eng Period vun dräi Joer, e Grondversuerger, de Fournisseur par défaut, fir gewëssen Zone fest. Déi lescht Grondversuerger huet den ILR den 1. Juni 2017 designéiert. Déi Period leeft deemno den 1. Juni 2020 aus.

Mat der Ännerung am Stroumgesetz kann de Regulateur elo déi aktuell designéiert Fournisseure par défaut nach bis zu sechs Méint nom État de crise verlängeren.

Da kréien alleguerten d'Stroum- an d'Gasfournisseure méi laang Zäit, fir dem Energieminister matzedeelen, wéi vill Energie dass se d'lescht Joer gespuert hunn. U sech hate se bis den 31. Mäerz dofir Zäit. An am Stroum- a Gasgesetz gëtt den Delai elo dëst Joer op den 31. Mee geännert.

Opgrond vun enger europäescher Direktiv aus dem Joer 2012 mussen d'Stroum- an d'Gasfournisseuren all Joer gewëssen Ziler an der Energieeffizienz erreechen. Op europäeschem Niveau war en Effizienzziel fir 2020 vun 20 % festgehal. Dat ass den Equivalent vun enger Aspuerung vun 368 Milliounen Tonne Pétrol am Endenergieverbrauch bis 2020.

An zu Lëtzebuerg mussen d'Fournisseuren all zesummen tëschtent 2015 an 2020 5.993 Gigawattstonnen aspueren, wat se ënner anerem iwwer Berodung oder Primmen um Client maachen.

Während dem État de crise kënnen d'Reseausgestionnaires evidenterweis net bei d'Clienten heemgoen, fir al Gascompteuren duerch intelligent Compteuren ze ersetzen. An dofir kréien d'Reseausgestionnaires elo bis den 31. Dezember 2021 Zäit, fir 90 % vun den ale Compteuren ze ersetzen. Den Datum gëtt am Gasgesetz ee Joer no hanner verréckelt.

Bis d'Enn vum leschte Joer waren ongeféier 66 % vun de Compteuren ersat. Fir d'Gasgestionnaire wär et souwiesou scho knapp ginn, fir den Termin anzehalen, a mam Confinement ass dat onméiglech ginn. Deen neien Datum ass elo eng méi realistesch Deadline fir d'Installatioun vun den intelligente Gascompteuren. A bis dohinner soll och d'Software, fir d'Smartmetere ofzeliesen, prett sinn.

Den intelligente Compteur, de sougenannte „Smarty“, ass e Schlëselinstrument vun der energeetescher Transitioun an erméiglecht dem Fournisseur wéi och dem Client eng méi effizient an intelligent Energienotzung. Dem Konsument erméiglecht e sougenannte „Smarty“ méi genee ze wëssen, wéi vill Energie en zu all Moment am Dag verbraucht. De Client huet also méi Informatiounen, fir säi Verhalten ze änneren an Energie ze spueren an esou méi aktiv ze ginn an der Energietransitioun. An e Smarty kann och op Distanz ofgelies ginn. Et muss also kee Rendez-vous méi beim Client doheim gemaach ginn, wat Zäit spuert fir de Client a fir de Fournisseur an esou d'Käschte fir d'Netznotzer, also d'Allgemengheet, reduzéiert.

Här President, Dir Dammen an Hären, de Staatsrot huet a sengem Avis proposéiert, d'Gesetzesännerungen, déi just d'Period vum État de crise concernéieren, iwwer e Règlement grand-ducal ze maachen, wéi et duerch den Artikel 32 Paragraf 4 vun der Verfassung während der Zäit vum État de crise méiglech ass. An deem Sënn huet d'Kommissioun zwou Dispositiounen, déi eebe just fir d'Zäit vum État de crise gëlle sollten, net zréckbehalen.

Heibäi gong et ëm d'Suspensioun vum Delai fir den Uschloss fir residentuell Clienten. An et gong drëm, dem Regulateur d'Méiglechkeet ze ginn, fir am État de crise d'Consultation publique ze ersetzen duerch eng Ad-hoc-Consultatioun vun de concernéierten Acteuren, wann et drëms geet, fir temporär Mesuren ze huelen,

Le saviez-VOUS ?

COMPTE RENDU

Le compte rendu est une publication de la Chambre des Députés qui reproduit dans leur intégralité toutes les interventions faites lors des séances plénières de la Chambre des Députés. Il contient par ailleurs un résumé des textes législatifs adoptés, les questions posées aux membres du Gouvernement et les réponses reçues ainsi qu'un aperçu général des activités de la Chambre des Députés. Le compte rendu est distribué gratuitement en tant que supplément des quatre principaux quotidiens à tous les ménages. Il peut être consulté en ligne sur www.chd.lu - Travail à la Chambre - Séances publiques - Comptes rendus des séances.



fir de Fonctionnement vum Elektrizitéitsmarché ze garantéieren.

An deem Sënn hu mir déi Artikelen aus dem deposéierte Gesetzesprojet och net zréckbehalen. D'Regierung huet dës Punkten och schonn den 8. Abrëll an e Règlement grand-ducal afléisse gelooss. An och deenen anere Remarque vum Staatsrot hu mer Rechnung gedroen.

Här President, Dir Dammen an Hären, ech kommen zum Schluss. Duerch d'Mesuren, fir d'Coronakris Meeschter ze ginn, mussen och am Gas- an am Stroumsecteur d'Friste geännert ginn, déi de Gesetzgeber ursprénglech virgesinn hat. An dat maache mer mat de Modifikatiounen an dem Gas- a Stroumgesetz, wéi se hei virleien. Dat heescht, den aktuelle Fournisseur par défaut vum Stroum kann ëm sechs Méint vum Regulateur verlängert ginn. D'Gestionnaire kréien ee Joer méi Zäit, fir déi intelligent Gascompteuren opzehänken. An d'Gas-an d'Stroumfournisseure mussen eréischt den 31. Mee dem Energieminister matdeelen, wéi vill Energie si d'lescht Joer agespuert hunn.

An an deem Sënn soen ech lech alleguerte villmools Merci fir d'Nolauschteren an ech ginn och direkt den Accord vun der grénger Fraktioun.

► **Mme Lydie Polfer (DP).**- Très bien!

► **M. Fernand Etgen, Président.**- Merci villmools, Här Benoy.

Als éischte Riedner ass den honorabelen Här Paul Galles agedroen. Här Galles, Dir hutt d'Wuert.

Discussion générale

► **M. Paul Galles (CSV).**- Här President, Dir Dammen an Dir Hären, dat Gesetz, dat eis de Rapporteur François Benoy grad virgestallt huet - an ech soen em fir seng schréfftlech a mëndlech Beméiunge villmools Merci -, schreift sech am Prinzip an an d'Rei vun all deene ville Gesetzer, déi mer elo am Kader vun der Coronakris stëmmen. An dat ass richtig esou, och wann ee muss soen, dass et och hei esou geschitt ass, an zwar, dass Weesentlech aus dësem Gesetzesprojet an aus dem éischten Entworf eeben hannen um Enn awer iwwer Règlements grand-ducaux gereegelt ginn ass. An dat ass u sech och e richtige Prinzip. Gesetzlech gereegelt gëtt dat, wat datumsmeisseg vun enger offizieller Bëendegung vum État de crise onofhängeg ass. An dëst Gesetz ass sënnvoll a fénnst och dofir eis ganz a voll Zoustëmmung.

Awer, Här President, Dir Dammen an Dir Hären, dëst Gesetz hei betrëfft menger Meinung no ee Beräich, deen eng ganz besonnesch Opmierksamkeet verdéngt, well hannert deenen technesche Froe vun zum Beispill dem Verlängere vun Delaie stinn zwou aner ganz grouss Froen:

Déi éischt ass déi vun der Prekaritéit, wéi et och an enger Rei vun Avisa monéiert ginn ass, besonnesch och am ganz kritischeschen Avis vun der Chambre de Commerce.

Grad elo, an enger Zäit, wou zum Beispill den Energieverbrauch sech vill vum industriellen a professionelle Beräich an dee private Beräich eraverlagert, gëtt eis nach eng Kéier däitlech, dass et vill Mënsche gëtt, an iwwregens och Entrepreneuren, fir déi och Energie kum Selbstläufer ass.

► **Une voix.**- Très bien!

► **M. Paul Galles (CSV).**- Net ëmsoss gëtt am Katalog vun den Aides sociales déi sougenannten „Assistance ...

► **Une voix.**- Jo.

► **M. Paul Galles (CSV).**- ... aux ménages en situation de précarité énergétique“ genannt, déi eigentlech zwou Saache leeschte soll: zum engen eng Berodung an zum aneren eng Subventioun fir de Remplacement vun engem Elektromanager, dee vill Energie frësst. Ugefrot gëtt déi Hëllef jo iwwert d'Office-socialen, déi am Moment awer weinst der Kris och an engem Régime réduit funktionéieren. Dierf ech dofir den Här Minister froen, ob e weess, ob vill Leit elo, wou den heemeschen Energieverbrauch an d'Luucht geet, dës Assistance ufroen an ob séchergestallt ass, dass elo an dëser Kris kee säin Elektresch oder säi Gas ofgestallt kritt?

► **Une voix.**- Très bien!

► **M. Paul Galles (CSV).**- An dat, Här President, Dir Dammen an Dir Hären, leet mech schonn iwwer zum zweete groussen Thema hannert dësem technesche Gesetz, dat grousst Gesetz iwwert den Energiemarché, wat mer am Moment an der Kommissioun diskutéieren a wou mer op Initiativ vun de Kollegee vun déi Lénk grad en Akzent drop setzen, dass

de Verbraucher esou einfach wéi méiglech un déi Assistance erukënnt, wann e se da brauch.

Dëst grousst Gesetz vum Energiemarché soll jo e Meilestee sinn an der Energietransitioun. An dës Kris léiert eis, dass mer op zwou Saache besonnesch sollen oppassen, wa mer dëst Gesetz virbereeden: déi sozial Gerechtegkeet an d'Kriseresilienz vun deem neien Energiemarché.

Här President, Dir Dammen an Dir Hären, an da geet et jo net eleng ëm de Consommateur, mee et geet och ëm d'Ekippen, déi déi Tächen, déi den Acteuren aus dem Secteur operleien, ausféiere sollen, bei enger Fuite oder engem Stroumausfall zum Beispill. Här Minister, kënnt Der eis heizou wannechgelift en Update ginn, wéi deen Noutfallplang an Zäite vum „physical distancing“ ausgesäit a wat geschitt, wann zum Beispill Leit aus enger Ekip positiv getest ginn.

Ech soen lech villmools Merci fir d'Opmierksamkeet.

► **Une voix.**- Très bien!

► **M. Fernand Etgen, Président.**- Merci villmools, Här Galles.

Nächsten ageschriwwene Riedner ass den honorabelen Här Max Hahn. Här Hahn, Dir hutt d'Wuert.

► **M. Max Hahn (DP).**- Merci, Här President. Wann e Rapporteur esou explizitt war, wéi dat an deem heite Fall de Kollege François Benoy war, souwuel a sengem schréfftleche wéi a sengem mëndleche Rapport, bleift mir als Spriecher eigentlech just nach eppes, dat ass him ze felicitéiere fir déi zwee Rapporten, an op där anerer Säit natierlech och den Accord vun der Fraktioun vun der Demokratescher Partei ze ginn.

Ech soen lech Merci.

► **Une voix.**- Très bien!

► **M. Fernand Etgen, Président.**- Merci villmools, Här Hahn.

An da wier et un där honorabler Madamm Cécile Hemmen. Madamm Hemmen, Dir hutt d'Wuert.

► **Mme Cécile Hemmen (LSAP).**- Jo, Här President, léif Kollegeen, léif Kolleginnen, och ech wéilt dem Här François Benoy Merci soe fir seng zwee Rapporten, dee schréfftlechen an dee mëndlechen. En huet et richtig gesot, et geet hei ëm dräi Upassunge vun Delaie, déi mer gesetzlech musse verankeren, well se eeben iwwert den Zäitraum vum État de crise erausginn. Et ass deem och näischt bäizefügen, well e wierklech ganz komplett war. Duerfir merci nach eng Kéier an ech ginn den Accord vun eiser Fraktioun.

► **M. Fernand Etgen, Président.**- Merci villmools, Madamm Hemmen.

An ech ginn d'Wuert direkt weider un den honorabelen Här Fernand Kartheiser. Här Kartheiser, Dir hutt d'Wuert.

► **M. Fernand Kartheiser (ADR).**- Jo, Här President, villmools merci. Dir Dammen an Dir Hären, ech wëll och fir d'éischt dem Här Benoy soen - wou ass den Här Benoy? - : Et wor net nëmmen e ganz gudden a komplette Rapport, mee e wor och emouvant. Ech komme gläich dorobber zréck. An dëst zu dëser spéider Stonn huet richtig guttgedoen. Mee ech wëll vläicht soen, dat mer am Prinzip och als ADR kee Problem hunn, fir déi Delaie ze verréckelen. Dat ass eng Klenggekeet. Dat ass eng Normalitéit. Dat drängt sech an dëser Zäit op. Dat ass net eise Problem.

Mir wëllen awer och déi Kriticken oder Froen opgräifen, déi d'Chambre des Salariés an d'Chambre des Métiers eis virleeën. Nämlech schwätzt d'Chambre des Métiers vun der Fro vun der Suspensioun oder enger Verleegung vum Bezuele vu Rechnungen, ënner bestëmmte Konditiounen. Ass do d'Regierung interesséiert drun? Mécht se dat? Well d'Regierung ass jo selwer Aktionär, huelen ech emol un, an enger Rei vun deene Gesellschaften, déi hei a Fro stinn, déi eigentlech d'Rechnungen dann zegutt hätten.

An d'Chambre des Salariés freet, ob de Risiko besteet, dat kann ofgespaart ginn an der Kris oder ob d'Leit och déi Raccordementer kënne kréien, déi onbedéngt néideg sinn.

Souwäit hu mir kee Problem! Mir stellen déi Froen a mir freeën eis, wann dat an engem soziale Sënn geléist gëtt.

Awer mir hunn e Problem als ADR, an do kommen ech op dat Emouvant zréck, wat den Här Benoy a sengem Rapport gesot huet. Hien huet e bësse verléift geschwat vum Smarty, dem Smartmeter, dem Compteur intelligent. déi gréng sinn do, oder vläicht nëmmen hien, ganz begeeschtert, emotional gebonnen! Mee wat ass de Smartmeter? De Smartmeter ass eng Technologie, déi installéiert gëtt, déi am Gasberäich all Stonn ofliest, déi am Elektresch

all Véierelstonn ofliest an déi nach ganz aner Méiglechkeeten huet.

An 2007, dat ass scho laang hier, dat sinn elo 13 Joer hier, huet dës Chamber déi Gesetzer gestëmmt, fir dat kënne bei de Leit ze instaléieren, obligatoresch.

Mee zënterhier huet sech onheemlech vill geännert! A virun allem huet sech vill geännert am Bewosstsi vun de Leit ëm d'Datesécherheet! Mir hunn och en anere legale Kader. Mir hunn de Règlement général sur la protection des données. Mir hunn aner Instrumenter. Mir haten eng Rei Skandalen, wou mer gewuer gi sinn, wéi einfach et ass, am Laf vun den nächste Joren iwwer elektronesch Mëttelen d'Leit auszespio-néieren. D'Sensibilitéit ass haut eng ganz aner.

A wa mer déi Diskussioun haut hunn, da kënne mer net méi higoen a soen: „Mir installéieren obligatoresch bei Leit esou een intelligente Compteur.“ Mir kënne soen: „Bei Leit, déi gär een hätten“, well e vläicht Virdeeler huet, a wann déi Leit dat akzeptéieren, da kënne mer dat maachen. Mee als ADR soe mer: „Obligatoresch kann dat net méi a Fro kommen an deem Kontext, wou mer haut sinn, no deene Léieren, déi mer haten, wat dat ugeet, de Mëssbrauch vun Daten.“

Dofir wäerte mir dëst Gesetz net matstëmmen, well mer einfach der Meinung sinn, dat mir de Leit e Choix musse ginn, ob se wëllen en intelligente Compteur oder en analoge Compteur. An do, wou schonn eng Kéier en intelligente Compteur installéiert gouf, mussen d'Leit och d'Méiglechkeet kréien ze soen: „Ech wëll en net méi. Ech hätt gär en analoge Compteur.“ Dat muss ouni Käschte fir déi Leit ersat ginn. Dat ass Dateschutz geliefert! Dat ass Respekt virun der Privatsphär vun de Leit! Dat ass Rechnung gedroen deenen Entwécklungen, déi mer an deene leschte Joren haten, engem ganz neie Bewosstsin, engem ganz neie Respekt virun der Privatsphär vun de Leit an der Datesécherheet.

An an deem Sënn, Här President, wëll ech lech och am Numm vun der ADR eng Motioun iwwerreechen, eng Motioun, déi als Zil huet, de Leit de Choix ze ginn: intelligente Compteur oder analoge Compteur.

Ech soen lech Merci.

Motion 1

D'Chamber vun den Deputéierte

stellt fest,

- datt no där aktueller legaler Basis an de Secteure vum Approvisionnement mat Gas an Elektresch d'Entreprises, mee och déi privat Stéit mussen mat „Smartmeter“, also sougenannten „intelligente“ Compteuren, équipéert ginn;

- datt sech an deem Kontext eng Rei vu Froe stellen, besonnesch wat eng méiglech Intrusioun an d'Privatsphär vun de Leit an de Risiko vun enger Verletzung vum Dateschutz ugeet;

- datt zënter de Gesetzer aus dem Joer 2007, déi d'Installatioun vun intelligente Compteure vorschreien, sech dat legalt Ëmfeld am Dateschutz substanzuell geännert huet, besonnesch och duerch de Règlement général sur la protection des données (RGPD);

- datt vill Leit haut op de Problem sensibiliséiert sinn, deen dora besteet, datt et net komplizéiert ass, fir hir Privatsphär duerch technesch Mëttelen ze verletzen;

- datt och vill Leit sech Suerge weinst enger eventueller Stralebelaaschtung duerch déi Compteure maachen;

- datt sech aus deene Grënn vill Leit dergéint wieren, fir intelligent Compteure bei sech doheem installéiert ze kréien;

fuerdert d'Regierung op,

- datt si der Chamber soll bannent sechs Méint e Gesetzesprojet virleeën, fir dat gesetzlecht Ëmfeld an deem Sënn ze änneren, datt d'Leit selwer kënnen decidéieren, ob si en intelligente Compteur wëlle bei sech installéiert kréien oder net;

- datt d'Leit, wann si schonn en intelligente Compteur kruten, deen nees kënnen, ouni datt dat mat Käschte fir si verbonnen ass, duerch en analoge Compteur ersetze loosser;

- der CNPD de Wonsch vun der Chamber ze iwwermëttelen, datt si ënnersiche soll (Data Protection Impact Assessment), wéi d'Reseausgestionnaires an d'Fournisseure vu Gas an Elektresch mat deenen Donnéeën ëmginn, déi d'Compteuren, virop déi intelligent Compteuren, hinne liwweren a wéi d'Datesécherheet an d'Rechter vum Konsument an deem Domän nach kënne verbessert ginn.

(s.) Fernand Kartheiser.

► **M. Fernand Etgen, Président.**- Merci villmools, Här Kartheiser.

An da géif ech d'Wuert weiderginn un den honorabelen Här David Wagner. Här Wagner, Dir hutt d'Wuert.

► **M. David Wagner (déi Lénk).**- Merci, Här President. Jo, mir wäerten natierlech deen heite Projet de loi och matstëmmen, well en eng Normalitéit ass, wéi dat gesot gouf, an dësen Zäiten, fir eeben d'Raccordementer op eng Postkrisenzäit weiderzeleeën.

Ech hätt just awer e puer Remarken trotzdeem ze maachen an och vläicht eng Fro ze stellen. Étant donné, datt sech an deene leschten Deeg jo ëmmer villes ännert, wësse mer, datt deem-nächst jo och d'Chantieren awer erëm kënnen opgoen. Dat war dee Moment, wou mer deen heite Projet de loi analyséiert hunn, jo nach net de Fall. Dat konnt ee jo och nach net wëssen. An et ass einfach eng Fro, fir ze wëssen, étant donné, datt awer erëm d'Chantieren opginn, datt vläicht Saache fäerdeg gemaach ginn, awéifern dann do duerno Raccordementer vläicht awer méiglech sinn. Oder wéi gëtt dat organiséiert? Dat wier just eng technesch Fro.

An dann duerno awer och eng Remark: Jo, mir deelen och als déi Lénk déi Remark, déi d'Chambre des Salariés gemaach huet. Obwuel mer der Meinung sinn, wa schonn och d'Fournisseuren innerhalb vun der Krisenzäit awer och noutgedrungen an op eng verständlech Aart a Weis hiren Obligatiounen net kënnen nokommen, si mer trotzdeem der Meinung, datt prinzipiell muss séchergestallt ginn, datt während der Krisenzäit kee Stroum oder Gas ewechgeholl kritt an datt och net d'Argument kann hierhalen, datt et ëmmer d'Méiglechkeet gëtt, fir bei engem Office social Demarchen ze maachen, fir dohinner ze goen. Mir sinn der Meinung, datt een awer déi Mesure do och muss sécherstellen.

Zu de Compteurs intelligents: Jo, dat ass eng laang Diskussioun. Ech wëll net dorobber agoen. Mee op jidde Fall muss een awer ëmmer oppassen, wa prinzipiell d'Digitaliséierung, an et ass jo och en Deel dovunner, wann dat als Léisung gesi gëtt, fir environnemental Froen ...

(Brouhaha et coups de cloche de la présidence)

... ze léisen oder sozial Froen ze léisen, datt dat de falsche Wee ass. An et muss ee sech och d'Fro stellen, wat der Digitaliséierung hir Empreinte carbone ass. Well et soll een net mengen, datt mer an enger virtueller Welt liewen: Iergendwou gëtt transportéiert, gëtt produzéiert. Also kann et och en Nullsummenspiel duerstelle par rapport zu den Zilsetzungen, déi am Zesammenhang si mat de sougenannten „intelligente“ Compteuren.

Wat d'Intelligenz ass, doriwwer misst een och eng Kéier diskutéieren. Ech zweifele staark do-run.

Op jidde Fall gëtt dat jo och op nach e weidert Joer verluecht. An ech mengen, dat ass dann eng Zäit, déi ee sech kann huelen, fir sech doriwwer Gedanken ze maachen. Anscheinend war d'Software souwisou net esou richtig fäerdeg, wat jo och e bëssem emouvant ass, wéi den Här Kartheiser et géif soen. Ech mengen, et muss ee sech ëmmer ganz aner Léisunge virstellen, wéi direkt wëllen de Wee vun der Digitaliséierung ze goen. Et gëtt vill méi sozial Weeën an och demokratescher Natur.

Ech soen lech Merci. Ceci étant dit, stëmme mer dat heiten natierlech mat.

► **M. Fernand Etgen, Président.**- Merci villmools, Här Wagner.

Leschten agedroene Riedner ass den honorabelen Här Marc Goergen. Här Goergen, Dir hutt d'Wuert.

► **M. Marc Goergen (Piraten).**- Merci, Här President. Merci dem François Benoy fir säi Rapport. Och mir Piraten wäerten dëse Projet matstëmmen. Mir wëllen awer nach eng Kéier d'Regierung drun erënnere, dass an dëse schwierigen Zäiten d'Leit net sollen ouni Gas oder Energie doheem stoen. A mir soen dofir a leeën hir och un d'Häerz, fir am Moment kengem Gas oder Stroum ofzeschalten.

► **M. Fernand Etgen, Président.**- Merci villmools, Här Goergen.

D'Regierung huet d'Wuert, den Energieminister, den Här Claude Turmes.

Prise de position du Gouvernement

► **M. Claude Turmes, Ministre de l'Énergie.**- Här President, léif Deputéierten, fir d'éischt wëll ech lech a virun allem den Deputéierten aus der Energiekommissioun Merci soen, dass mer esou schnell zesumme konnte schaffen iwwer Visio- oder Videokonferenzen. Ech wëll och besonnesch dem Président-rapporteur, dem Här Benoy, Merci soe fir d'Presidence vun deene Reuniounen, awer och fir säi Rapport.

Ech wëll awer dann och dem Conseil d'État Merci soen, dass deen esou schnell säin Avis gemaach huet. Deen Avis vum Conseil d'État huet eis och gehollef, eis éischt Versioun llicht ze adaptéieren. A mir sinn op all déi Virschléi vum Conseil d'État agaangen.



An da wëll ech awer och menge Beamten, déi fläisseg heirunner geschafft hunn, dem Gérard Meyer, dem Marco Hoffmann an och dem Anne Metzler, ausdrécklech Merci soe fir hir ganz Aarbecht, awer och dem Sarah Jacobs, dat matgeholfel huet um Rapport.

Hei maache mer eng Rei kleng Ännerungen, déi néideg sinn an dëser Kris. Ech mengen, den Här Benoy huet dat gutt erkläert. Et geet drëm, dass mer de Régulateur par défaut brauchen, op deem een zréckfält, wann eng Kéier e Fournisseur vu Stroom géif faillite goen; dee leeft aus am Juni. A fir dass do elo net en onnéidegen Drock entsteet, gëtt déi Frist ëm sechs Méint verlängert.

Den Här Benoy huet och gutt erkläert, dass mer e System hunn: All Gas- a Stroomversuerger muss och ëmmer nowiesen, dass en Energieeffizienzmoossname mécht mat de Bierger, mat de Betriber. Och do kommen déi elo e bëssen an d'Labrënten opgrond vun der Coronakris.

An da bei de Smartmetere beim Gas ware mer effektiv schonn e bëssen am Retard. Mir hunn elo en Delai gesicht, dee mer och mat de Gasliwweranten, also d'Sudgaz, d'Creos, d'Stad Diddeleng, déi, déi mussen de Gas bei d'Leit bréngen, diskutéiert hunn. Mir hunn elo eng Deadline fonnt, wou ech denken, dass jiddwereen domadder ka liewen. An déi ass och méi realistesch.

Vläicht dann nach eng Kéier zu de Remarken, déi hei komm sinn, engersäits vum Här Galles: Ech mengen, d'Précarité énergétique ass eppes ganz, ganz Wichteges. Et ass och eppes, wat mir wierklech um Häerz läit. Ech hunn a menger Zäit als Europadeputéierten derfir gesuergt, dass europawäit elo quasi all Regierungen an Europa gezwonge sinn, fir d'Précarité énergétique eescht ze huelen. Dat war hei zu Lëtzebuerg scho virdrun de Fall, muss awer och elo iwwerall an Europa gemaach ginn.

An ech kann lech just soen, och wann een eise System vergläicht mat deem, wat am Ausland ass: Mir hunn e ganz gudder System. Mir maachen dee System elo opgrond och vun engem Amendement, deen den David Wagner abruecht huet, an engem parallele Gesetz nach e bësse besser. An ech kann lech garantéieren, dass an dëser Kris wierklech keen do am Ree stoe gelooss gëtt an dass och kee weeder de Stroom nach de Gas ofgeschalt kritt.

Den Här Galles huet och nach déi Fro opgeworf vun der Sécherheet. Ech wëll da vläicht einfach elo och profitéieren dovun, fir all de Leit aus dem Energiesecteur, déi déi lescht Woche wierklech och un der Front waren, ob dat elo war bei der Creos, ob dat war also beim Netzbedreiwer, bei de stätteschen Netzbedreiwer, ob dat bei de Gasnetzbedreiwer war, awer och am Pétrolssecteur, ech mengen, déi Leit, déi an dëse Konditiounen awer derfir gesuergt hunn, dass d'Tanklagere voll sinn, déi Leit, déi och ënner schwierere Konditiounen an den Tankstellen de Verkauf asuréiert hunn, ech wëll deene vun hei aus alleguerte Merci soen.

An ech wëll lech just soen, dass ganz gutt Moossnamen, zum Beispill bei der Creos, virun allem och am Dispatching, also do, wou de Stroom verdeelt gëtt, geholl gi sinn. Do sinn extra nei Ekippe gebilt gi mat extra Schichten. Déi Leit, déi hu separat, aner Toiletten. Déi kräize sech net méi. An all déi Moossnamen hunn derzou gefouert, dass mer keen e Fall hunn, deen an deenen Energiebetriber opgetratt ass. An dat ass och d'Resultat vun där ganz gudder Preparatioun, déi eigentlech d'Energiebetriber hunn.

Vläicht nach en Detail. Et ass och esou dass, wann am Moment iergendee Problem beim Gas wier, da misst natierlech zum Beispill e Mann oder eng Fra vu Sudgaz awer an en Haus goen. An do hu mer en Accord mam CGDIS, dass déi dann och déi néideg Sécherheetskostümer kréien, fir dass déi Aarbechte kënnen ënnert den néidege Sécherheetsaspekter duerchgefouert ginn. Soudass, mengen ech, all déi gutt Moossnamen, déi do sinn, effektiv flott ëmgosat ginn. An nach eng Kéier vun hei aus, vu mir, an ech mengen, Dir kënnt lech do och uschlëssen, all de Leit aus dem Energiesecteur e grouse Merci fir dat, wat se déi lescht Woche fir eis all gelescht hunn!

Den Här Kartheiser huet méi prinzipiell elo nach eng Diskussioun iwwert de Smarty ugeeregt. Ech mengen, et ass kloer, dass alles, wat mer do maachen, mat der Dateschutzkommission ofgeschwat ass. Dat heescht, mir hunn do den Dateschutz respektéiert. An ech mengen, dat, wat Der do an der Motioun opwerft - géif ech emol vu mir aus soen -, géif ech ofleeen, well dat onnéideg ass.

Den Här Wagner hat dann och nach eng Kéier de Punkt opgeworf vun der Précarité énergétique. Merci nach eng Kéier, dass mer do, mengen ech, iwwer all d'Parteigrenzen eraus,

vum Paul Galles bis och bei lech, esou e groussen Accord hunn. Précarité énergétique ass eis wichteg a mir maachen alles hei zu Lëtzebuerg, dass mer e gutt Netz hunn, fir do de Leit entgéintzekommen.

Vläicht nach e lescht Wuert. Et sinn eenzel Federatiounen, déi gefrot hunn, dass een elo d'Rechnungen net méi sollt bezuelen. Dir musst awer wëssen: Mir hunn nieft dem groussen Enovos, wou de Staat mat dran ass, och kleng Fournisseuren! Mir hunn, fir der zwee ze nennen, zu Miersch e Fournisseur, dat ass e Familljebetrieb. Wann elo deem een d'Rechnung net méi bezilt, jo, da kënnt deen aneren an d'Bredouille! A mir hunn en anere Fournisseur nach am Réidener Kanton. Dat heescht, mir wëllen als Regierung net, dass elo aner mëttelstännesch Betriber a Schwieregkeete kommen, just nëmmen, wa mer hei e bësse salopp géife soen: „Bezuel't Är Rechnungen net méi!“

An duerfir si mer an der Regierung op de Wee gaangen, dat hunn ech och mat de Kollegen an der Regierung esou duerchgeschwat: Mir hëllefen alle Betriber hei zu Lëtzebuerg direkt! Dat heescht, wann d'Haus iergendwou brennt, dann hëllefe mer bei deem Haus. A mir wëllen net, dass dat Haus en anert Haus nach ustécht. An duerfir wëlle mer, dass all Rechnunge bezuelt ginn. A mir gi jo och de Betriber d'Méiglechkeet, iwwer all déi Hëllefprogrammer, déi mer maachen, fir dass mer an déi Richtung do eng zolidd, robust Politik hunn, déi net nach anerer a Schwieregkeete bréngt, mee mir hëllefen direkt do, wou et richtig ass, an dat ass direkt am Ufank.

Ech soen lech villmools Merci.

► **Une voix.**- Très bien!

► **M. Fernand Etgen, Président.**- Den honorebelen Här Gilles Roth huet nach d'Wuert gefrot.

► **M. Gilles Roth (CSV).**- Ech wollt nach dem Minister Merci soe fir eigentlech déi Appreciation, déi e ginn huet fir déi Leit, déi an dem Energiesecteur schaffen. Well wann an enger Kris den Energiesecteur, an dat ass oft dobaussen net bekannt, net leeft, da ginn dat ganz grav Konsequenze fir d'ganz't Land.

An ech hätt an deem Kontext eigentlech d'Fro un den Här Minister, en ass do agaangen op déi eenzel Salarié vum der Creos a vun aneren, ob hien awer och net der Meenung wier, dass, wann déi Leit fir hir ausseruerdentlech Aarbechten, déi se während der Kris maachen, géifen eng Primm, zum Beispill vun der Creos oder esou, bezuelt kréien, dass se déi net géifen zum volle Montant taxéiert kréien, ob en och déi Meenung kéint deelen.

► **M. Fernand Etgen, Président.**- D'Wuert geet zréck un den Här Minister.

► **M. Claude Turmes, Ministre de l'Énergie.**- Also, Här Roth, ech hat ganz opmierksam nogelauschert virdrun. An duerfir weess ech, dass Dir do eng Motioun abruecht hutt. Déi Motioun geet jo och an d'Finanzkommission an da gëtt se do weiderdiskutéiert. An ech mengen, et ass elo net u mir, ...

► **Mme Martine Hansen (CSV).**- Si ass hei ofgestëmmt ginn!

(*Brouhaha général*)

► **M. Claude Turmes, Ministre de l'Énergie.**- Ma nee, hir Motioun ass ... Ass se ganz ofgeleent ginn? Gutt.

Déi Diskussioun, déi gëtt weidergefouert. An ech mengen, dass mer do als Majoritéitsparteien an als Regierung eng kloer Linn hunn an déi verteidegen ech och. Ech soen lech Merci.

► **Plusieurs voix.**- Très bien!

► **M. Fernand Etgen, Président.**- Ech mengen, den Här Benoy hat nach d'Wuert gefrot.

(*Brouhaha général*)

A nee! D'Diskussioun iwwert ...

(*Interruption*)

Jo, den Här Roth nach eng Kéier!

► **M. Gilles Roth (CSV).**- Ma ech hu wierklech zur Kenntnis geholl, dass de Minister och eis Motioun matkritt huet. An en huet och matkritt, dass déi da majoritär vun de Majoritéitsparteien ofgeleent ginn ass. An de Minister huet zum Schluss gesot, d'Regierung an d'Majoritéitsparteien hätten do eng kloer Linn. An duerfir wollt ech awer froen, wouran déi kloer Linn dann do géif bestoen.

► **M. Laurent Mosar (CSV).**- Très bien!

► **M. Fernand Etgen, Président.**- Den Här Fernand Kartheiser hat nach d'Wuert gefrot.

► **M. Fernand Kartheiser (ADR).**- Ech hunn och eng Fro un den Här Minister, awer net direkt an deem selwechte Kontext. Wann Der mer erlaabt, da stellen ech se elo, da kann den Här Minister vläicht och drop äntweren.

► **M. Fernand Etgen, Président.**- Jo.

► **M. Fernand Kartheiser (ADR).**- Oder ech waarden e bëssen. Wéi Der wëllt, Här President. Soll ech se direkt stellen?

► **Plusieurs voix.**- Jo.

► **M. Fernand Etgen, Président.**- Jo, stellt se direkt!

► **M. Fernand Kartheiser (ADR).**- Ma da soen ech lech Merci. Den Här Minister huet jo gesot, si géife mat der Commission nationale pour la protection des données zesummeschaffen an do wär also kee Problem, wat den Dateschutz ugeet. Ech hunn elo hei d'Äntwert vun der Regierung op eng Question parlementaire, déi d'Kollege vun der CSV gestallt haten. Ech mengen, dat waren déi Häre Roth a Mosar, ...

► **M. Laurent Mosar (CSV).**- Jo.

► **M. Fernand Kartheiser (ADR).**- ... wann ech mech gutt erënneren, dat war am November, Enn November zejoert. An do äntwert den Här Minister: « Les préoccupations exprimées par la CNPD, notamment dans son avis et en partie reprises dans l'avis émis par le Conseil d'État, relatives à la conservation des données au “quart-horaire” pour l'électricité et “horaire” pour le gaz naturel - permettant selon eux d'obtenir un profilage détaillé des habitudes des individus et comportant des risques que ces données ainsi collectées soient attentatoires à la vie privée des individus - ont pu être écartées en grande partie. » Also net ganz!

Dat heescht, d'Regierung gëtt hei selwer zou, datt Problemer bestinn am Dateschutz!

Elo froen ech awer den Här Minister, wéi e kann heihinnerkommen a soen: „Et ass kee Problem, mir schaffe mat der Dateschutzkommission zesummen“, an e gëtt schréfflech der Chamber eng Äntwert, wou e seet, datt d'Problemer net ganz fort sinn? Dat ass allerding's net akzeptabel! Här Minister, sot eis: Wou ass de Problem? A wat maacht Der, fir deen aus der Welt ze schafen?

► **M. Fernand Etgen, Président.**- Merci, Här Kartheiser. An ech ginn d'Wuert zréck un den Energieminister.

► **M. Claude Turmes, Ministre de l'Énergie.**- Also nach eng Kéier: Alles, wat mer maachen an der Kollekt vun den Donnéeën (...)

(*Micro non allumé*)

Nach eng Kéier: Wat den Traitement vun den Donnéeën vun de Smartyen ugeet, dat si Protokoller, déi sinn alleguer ofgeschwat mat der Dateschutzkommission. An d'Dateschutzkommission, mengen ech, huet dat bis dato guttgeheescht. Esou gesinn ech net, firwat do e Problem wier.

Nach eng Kéier zréck op dem Här Roth seng Fro, wann ech mech virdru vläicht net kloer genuch ausgedréckt hunn. Ech mengen, et ass de Betriber hir Verantwortung an och hir Saach, an ech mengen, dat iwwerloosse mer de Betriber. Dat ass eis Linn.

(*Interruptions diverses*)

► **Mme Martine Hansen (CSV).**- D'Besteuerung awer, mengen ech, net!

► **M. Claude Wiseler (CSV).**- D'Besteuerung awer net! Dat ass schonn eng Regierungsdecision.

► **M. Claude Turmes, Ministre de l'Énergie.**- Jo!

(*Hilarité et brouhaha*)

► **M. Fernand Etgen, Président.**- Den Här Roth wëllt nach ...

► **M. Claude Wiseler (CSV).**- Jo, wat ass dann d'Äntwert, Här Minister?

(*Brouhaha général*)

► **Une voix.**- Wou ass d'Linn?

► **M. Gilles Roth (CSV).**- Här Minister!

► **Une voix.**- Elo leeft de Minister fort!

► **M. Gilles Roth (CSV).**- Här Minister, et ass scho richtig, dat deele mir mat lech. Wann den Employeur, ob dat eng ëffentlech oder eng semiëffentlech ...

(*Interruptions*)

... Entreprise ass, eng Primm bezilt, dann ass dat d'Decision vun där Entreprise. Mee dat, wat eis jo interesséiert, dat ass: Wéi ass d'Besteuerung, déi d'Regierung vun där Primm wëllt maachen? Well ech ginn lech Recht ...

(*Interruption par M. le Ministre Claude Turmes*)

Jo dach! D'Rechnung ass awer ganz einfach: Wann Dir eng Primm zousätzlech zu dem Salair ausbezuelt a wann de Montant vun der Primm 100 Euro sinn, da ginn do 55 Euro Steiere plus Sécurité sociale erëm zréck un de Staat. An Dir hutt virdru gesot, Dir hätt do eng

kloer Linn. Sot eis am Numm vun der Regierung, wat déi kloer Linn ass!

► **M. Fernand Etgen, Président.**- Merci villmools, Här Roth.

► **M. Claude Turmes, Ministre de l'Énergie.**- Also ech mengen, Här Roth, déi Diskussioun war virdrun. Mir hunn där Diskussioun als Regierung nogelauschert. An ech kann déi Fro och nach eng Kéier mathuelen an de Regierungsrat. Mee nach eng Kéier: D'Verantwortung ass bei de Betriber, an da kucke mir, wéi mer dat steierlech reegelen.

(*Interruptions*)

► **M. Claude Wiseler (CSV).**- Dat ass awer keng kloer Linn, dat do!

► **M. Fernand Etgen, Président.**- Merci, Här Claude Turmes.

D'Diskussioun ass elo ofgeschloss. Mir kommen elo zur Ofstëmmung iwwert de Projet de loi 7546. Den Text steet am Document parlementaire 7546⁴.

Vote sur l'ensemble du projet de loi 7546 et dispense du second vote constitutionnel

Fir d'éischt déi perséinlech Stëmmen iwwert de Wee vum Vote électronique.

(*Brouhaha général*)

► **Une voix.**- Mir verstinn hei näischt!

► **Une seconde voix.**- De Mikro, Här President!

► **M. Fernand Etgen, Président.**- Voilà!

► **Plusieurs voix.**- Aa!

► **M. Fernand Etgen, Président.**- Mir kommen dann elo zur Ofstëmmung. Fir d'éischt déi perséinlech Stëmmen iwwert de Wee vum Vote électronique. Duerno maachen ech een Appel nominal fir de Vote par procuration. D'Ofstëmmen fänkt un.

De Quorum ass erreecht. Ech bieden déi, déi e Vote par procuration wëllen ofginn, d'Hand an d'Luucht ze hiewen!

Appel nominal (votes par procuration)

De Vott ass ofgeschloss: Dëse Projet ass mat 55 Jo-Stëmmen a mat 4 Nee-Stëmmen ugehall.

Ont voté oui : Mmes Diane Aehm, Nancy Arendt épouse Kemp, MM. Emile Eicher, Paul Galles, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Georges Mischo, Mme Octavie Modert, M. Laurent Mosar, Mme Viviane Reding, MM. Gilles Roth, Marco Schank, Marc Spautz, Serge Wilmes (par M. Gilles Roth), Claude Wiseler et Michel Wolter (par Mme Martine Hansen) ;

MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn (par M. Gilles Baum), Mme Carole Hartmann, MM. Pim Knaff, Claude Lamberty et Mme Lydie Polfer ;

Mme Simone Asselborn-Bintz, M. Dan Biancalana, Mmes Tess Burton, Francine Closener (par M. Georges Engel), MM. Yves Cruchten, Mars Di Bartolomeo, Georges Engel, Claude Haagen, Mmes Cécile Hemmen et Lydia Mutsch (par M. Claude Haagen) ;

Mme Semiray Ahmedova, MM. Carlo Back, François Benoy, Mmes Djuna Bernard, Stéphanie Empain, Chantal Gary, M. Marc Hansen (par Mme Josée Lorsché), Mme Josée Lorsché et M. Charles Margue ;

MM. Sven Clement et Marc Goergen ;

MM. Marc Baum et David Wagner.

Ont voté non : MM. Jeff Engelen, Gast Gibéryen (par M. Fernand Kartheiser), Fernand Kartheiser et Roy Reding (par M. Jeff Engelen).

Freet d'Chamber d'Dispens vum zweete Vote constitutionnel?


(*Assentiment*)

Et ass also esou decidéiert.

Da kéime mer elo zum Vott respektiv zur Diskussioun vun der Motioun, déi den Här Kartheiser deposéiert huet. Fir d'éischt wollt den Här François Benoy ee Wuert dozou soen.

Motion 1

► **M. François Benoy (déi gréng).**- Merci, Här President. Et ass effektiv esou, dass ech total begeeschtert si vum „smart metering“. Voilà! Et ass och op europäeschem Niveau scho längst decidéiert, dass an der ganzer Europäescher Unioen Smartmetere sollen installéiert ginn. An do ass den Delai och deen, dass dat 80 % solle si vun de Compteure bis 2020. An et geet een och dovun aus, dass, wéi ech dat och virdrun ausgefouert hunn, d'Smartmeteren



immens wichtig si fir d'Zukunft och um Wee vun der energieetescher Transition, dass een insgesamt och do kann e gudde Pak Energie spueren.

A well de Paul Galles virdrun de Projet de loi vun dem Stroum, dee mer de Moment an der Kommissioun diskutéieren, an d'Spill bruecht huet, wëll ech och soen, dass ee vun de wichtigste Punkten, déi mer do diskutéieren, eeben dee ganze Volet Prosumer ass, wou et eeben drëms geet, dass een engersäits och selwer Produzent ka si vum Stroum wéi och Konsument. A grad dofir brauche mer och déi Technologie, déi allgemeng eng Netzentlaaschtung och duerstellt, wat gutt ass fir d'Dezentraliséierung. An deem Sënn ass dat wierklech e wichtigen Outil.

An dofir proposéiert meng Fraktioun (veuillez lire: An dofir proposéiert meng Fraktioun, dës Motioun ofzeleenen) a meng Fraktioun wäert déi Motioun dofir net matstëmmen. Merci.

► **M. Fernand Etgen, Président.**- Merci, Här Benoy. An dann huet den honorabelen Här David Wagner d'Wuert gefrot.

► **M. David Wagner (déi Lénk).**- Merci, Här President. Jo, ech mengen, déi Diskussioun ronderëm d'Smartmetere ass an eisen Aen eng Diskussioun, déi awer misst kënne gefouert ginn. Ech sinn elo, mengen ech, genau fënnf joer Member vun der Chamber - et war am Abrëll 2015, jo - an ech hunn net an Erënnung, mee ech ka mech awer vläicht ieren, dass mer eng gréisser Diskussioun doriwwer gefouert hätten.

Et ass awer och net esou ..., also, ech verstinn déi Begeeschterung einfach net. Fir mech ass dat Naivitéit. Ech weess net, ob d'Smartmetere problematesch si fir d'Gesondheet. Souwäit ech gelies hunn, mengen ech éischter net. Ech mengen, dass dat och net den Hauptproblem ass.

Mee et gëtt awer Froen, déi sech stellen iwwert d'Finalitéit. Et gëtt Froen, déi sech stellen iwwer alternativ Methoden, fir Energie ze konsumméieren, well ech wëll erëm eng Kéier soen, dass een eng Kéier driwwer diskutéiere misst, wivill ee spuert a wivill een awer och als Empreinte carbone bei deene Methoden hanerléist. Et ass e bësse méi komplizéiert wéi dat. An och iwwert den Dateschutz muss een awer kënne diskutéieren.

Et kann een net einfach esou am Plenum soen: „Et ass alles an der Rei, et ass alles an der Rei. D'CNPD huet gréng Luucht ginn.“ Ech mengen, et sinn immens vill Froen, déi ee muss kënne awer diskutéieren an aller Rou.

An ech géif et schued fannen, wann een d'Motioun einfach esou géif ofleenen. Ech géif proposéieren, dass mer awer eng Réunion jointe maachen. Mech géif et brennend interesséieren, och verschidden Acteurs vun deem Secteur ze gesinn an doriwwer ze diskutéieren. Ech kéint mer virstellen, dass een eng Réunion jointe mécht vun de Kommissiounen Energie a Medien oder Kommunikatioun - ech mengen, dat sinn déi, déi betraff sinn, wann ech mech net ieren - an dass een eng Kéier awer och wierklech doriwwer kann diskutéieren.

D'autant plus dass dat mer en Delai hunn. Ech mengen, et soll een net onbedéngt ëmmer Verschwörungstheorien op d'Mauer engersäits zeechnen, mee anerersäits soll een och net béatement, naïvement mengen, dass dat eng Lösung wär fir den Energieproblem.

Ech soen lech Merci.

► **M. Fernand Etgen, Président.**- Merci villmools, Här Wagner. An da geet d'Wuert weider un den honorabelen Här Paul Galles.

► **M. Paul Galles (CSV).**- Merci, Här President. Am léifste géife mir soen: „Kommt, mer verweisen dës Motioun an d'Kommissioun an diskutéiere se eng Kéier!“ Et sinn u sech dräi Punkten, déi an dëser Motioun interessant sinn. Den éischte Punkt ass dee vun der Fro vun der eventueller Stralebelaaschtung, wat, mengen ech, e Punkt ass, deen een awer muss seriö diskutéieren. Well wann och nëmmen e Risiko besteet, dass et kéint sinn, dass eng Stralebelaaschtung besteet, da muss mer eis dat awer nach eng Kéier ganz genau zu Gemitt féieren.

Den zweete Punkt ass dee mat der Fräiheet, ob een dann elo e Smarty huet oder en analoge Compteur wëllt zrëckkréien oder behalen, dat ass eng Fräiheet, déi kléngt zwar ganz gutt, ass awer e bëssen trügeresch, well op ville Plaze scho längst ersat ginn ass. An ech mengen, wann ech mech richteg un d'Zuelen erënnere, déi de Minister eis gesot hat, da sollt bis den 31. Dezember 2020 ursprénglech scho 70 % vun de Compteuren eigentlech ersat

ginn. Dofir ass et e bëssen trügeresch, zemools mer hei natierlech och e Gesetz virleien hunn, wat dat eigentlech virgesäit.

An een drëtten Punkt ass deen eebe vun dem Dateschutz, wou mir mengen, dass et ganz wichtig ass, dee Punkt awer eng Kéier a Rou ze diskutéieren an och ze kucken, wat fir en Avis dann d'CNPD do wierklech virleien huet, an doriwwer dann och ze diskutéieren.

Eis Propos wär dofir, déi ganz Motioun an d'Kommissioun ze verweisen. Eng aner Propos wär, mee mir mussen da kucken, wéi d'Kolleege vun der ADR dat da gesinn, am anere Fall se einfach ze splécken - mam leschten Deel si mer esou oder esou d'accord - an déi éischt zwee Punkten dann an d'Kommissioun ze verweisen. Dat Besch wär, se einfach integral an d'Kommissioun ze huelen.

Ech soen lech villmools Merci.

► **M. Fernand Etgen, Président.**- Merci, Här Galles. An da ginn ech d'Wuert weider un den honorabelen Här Sven Clement.

► **M. Sven Clement (Piraten).**- Här President, léif Kolleginnen a Kollegeen, dat heite schwätzt mech a méi wéi engem Theemeberäich un. Dat Éischt ass: Se ass mer op den éischte Bléck ganz sympathesch, d'Motioun. E fräie Choix. Et ass exzellent, dass elo op eemol d'Regierung nach eng Kéier soll e Projet de loi déposieren, wou u sech, wa mer eis als Chamber géifen escht huelen a mer dat dote wierklech wëilten, all Deputéierten och kéint eng Proposition de loi schreiwen.

Ech mengen, mir hunn haut sechs Proposition-de-loien hei ugeholl, soudatt se weiderginn an der Prozedur. Dat weist, dass dat en Outil ass, deen ee ka benotzen.

An ech sinn der Meinung, an dat ass de Grond, firwat ech mam éischte Punkt vun der ADR-Fuerderung net averstane sinn, dass, wa mer eis als Parlament an als Deputéierten escht huelen, dass mer sollen déi Texte, wa mer eppes annere wëllen, och schreiwen. An net soen: „Wannechgelift, léif Regierung, schreift eis dach eppes, fir eppes réckgängeg ze maachen, wat Der selwer deposéiert hutt!“ Ech mengen, dat wär u Logik iergendwéi net ze verstoen. An deementspriedend hunn ech mam éischte Punkt e Problem, och wa mer grondsätzlech d'Fuerderung vum fräie Choix dach sympathesch ass.

Dann deen zweete Punkt, dass d'Leit sollen hire Compteur erëm op de Müll puche kënne. Ganz éierlech: Mir schwätzen hei vun Nohaltgeheet! Mir schwätzen hei vun enger Économie circulaire! Mir hu schonn e Problem mat Elektromüll an da solle mer de Leit soen: „Ma Dir hutt elo e Compteur, da pucht en op de Müll!“ Ech hunn do och e bësse meng Bedenken, dass dat déi richteg Pist an déi Richtung ass.

An da komme mer zu där technescher Fro. An erlaabt mer, dass ech do e bëssen aushuelen, an ech hoffen, dass de President net direkt op d'Klack schléit!

Dat Éischt ass d'Frequenz, d'Stralebelaaschtung, dat, wat ganz gären a Youtube-Videoen op obskuren Internetsäiten a soss iwwerall kommentéiert gëtt. Ma de Smarty sent op 868 Megahertz. Sou, wat ass dat? Dat ass eng Zuel. Dat seet guer näischt aus. 868 Megahertz ass en Deel vun der Digital Dividend. Dat ass also eng Frequenz, déi fräi ginn ass doduerjer, dass mer haut net méi analog Télee kucken, mee digital. Dat ass also eng Frequenz, wou fir Dekade laang Stralebelaaschtung existéiert. Dat ass keng nei Belaaschtung. Tout au contraire, déi Frequenze ginn haut manner benotzt, well mer net méi Tonnen Téleeskanal op genau deem Frequenzband ausstralen. Wien also sech drun erënnert, dass mer nach d'Télee gekuckt hu mat enger Antenn, déi mer hu missen ariichten, ma dee weess, dass en där Stralung scho mindestens zënter där Zäit ausgesat ass. Huet also dat iergendeppes mat medezinnescher Sécherheet oder mat engem „Mer-denken-nach-eng-Kéier-no“ ze dinn? Probablement net! Well déi Frequenze gi säit Jorzéngte benotzt. Dat also zur Stralebelaaschtung!

Ech mengen, dass ee sech do wierklech muss bewusst sinn, iwwer wat ee schwätzt, an dann och technesch sech bewusst sinn, iwwer wéi eng Frequenzen ee schwätzt.

Et gëtt méi geféierlech Frequenzen, ioniséierend Stralung. Dat heiten ass keng. Dat hei ass eng Frequenz, déi säit Jorzéngte benotzt gëtt, iwwregens och fir wireless Mikroen, fir Telecommanden, fir Walkie-Talkien, also fir eng ganz Rëtsch vu Gebräicher, wou d'Leit sech awer keng Gedanken ëm d'Stralebelaaschtung maachen. Deementspriedend sollt een dat Argument wierklech mat Virsicht genëssen.

Dat Zweet ass: Déi ganz Kommunikatioun vum Smarty gëtt, anescht wéi an anere Länner, no engem Standard verschlüsselt, dee bekannt ass. All Gerät huet säin eegene Schlëssel, deen den

Netzbedreier lech och gäre gëtt, wann Der frot. Da kënnt Der selwer nokucken, mat e bësse bastelen a mat Open-Source-Software, wéi Der Stroum verbraucht. Dir kënnt also Äre Smarty kontrolléieren. Dir kënnt selwer novollzéien, wat dee Smarty wéini mécht. De Problem ass och net d'Datenerhiewung. D'Datenerhiewung, wivill Stroum ech verbraucht hunn, dat ass eppes, wat historesch soss vun engem erhuewe ginn ass, deen - an do weess een dann och net méi, wien ee virun der Dier stoen hat -, geschellt huet an dee mat lech an de Keller gaangen ass an op Äre Compteur gekuckt huet an ënnerwee natierlech och gesinn hutt, wéi Der gewunnt hutt, an esou weider.

Den Dateschutz ass e Problem beim Späichereen a beim Verschaffe vun deenen Donnéeën.

(Interruption)

Well, an do sollt mer och ganz pragmatesch drun erugeen, d'Sécherheet beim Späichereen ass vläicht bei grouse Gruppen, déi Geld hunn, fir doranner ze investéieren, eventuell potenziell besser opgehewen, mee wéi de Minister et richtig gesot huet: „Mir hunn hei zu Lëtzebuerg Operateuren, dat si Familljebetrieb.“

(Interruption)

An ech kommen aus dem Secteur, wou ee vill mat klenge Betriber an der Informatik zesummeschafft. A wa mer wëssen, dass schonn de Staat et net ëmmer fäerdegbréngt, all Datebank ze securiséieren, da muss ee sech d'Fro stellen, ob déi Datebanken hei gutt genuch securiséiert sinn.

Dofir, den drëtten Punkt vum DPIA interesséiert mech brennend. Ech géif dat Dokument gäre liesen, wa mer esou eent erstellen. Ech géif et och gutt fannen, wann dat an enger Kommissioun géif presentéiert ginn.

Déi zwee éischt Punkten, muss ech ganz éierlech soen, déi gehéiere fir mech an d'Kategorie vum Folklor. An do kann ech dann d'Motioun och net matdroen, wa se da sollt integral zum Vott kommen.

Ech soe Merci.

► **M. Fernand Etgen, Président.**- Merci villmools, Här Clement. Dann hat den Här Kartheiser nach eemol d'Wuert gefrot.

► **M. Fernand Kartheiser (ADR).**- Villmools merci, Här President. An ech soen och Merci deene Lénken an der CSV fir hir konstruktiv Interventiounen.

► **Mme Nancy Arendt épouse Kemp (CSV).**- Et ass e bësse wäit ewech!

► **M. Fernand Kartheiser (ADR).**- Ech ... Jo, et ass e bëssen eng Réckkoppelung. Ech weess zwar elo net, ...

(Interruptions)

Bon, ech probéieren. Also, Här President, ech wollt deene Lénken an der CSV Merci soe fir hir konstruktiv Bäitrag. Ech huelen Nott vun der Positioun vun deene Gréngen, déi jo weider ganz verléift sinn an de Smarty. Den Här Benoy huet eis dat elo hei offiziell gesot.

A mat allem Respekt fir d'Kollegeen, mee ech kann nëmme laachen iwwert d'Positioun vun de Piraten. Wëst Der, ...

► **M. Sven Clement (Piraten).**- Ech och iwwer Är, Här Kartheiser!

► **M. Fernand Kartheiser (ADR).**- ... et ass esou: Heiansdo gesi mer an der Politik, dass eng Partei hir Meinung wisselt, wa se vun der Oppositioun an d'Regierung geet, wéi déi gréng beim CETA, zum Beispill, oder ... Et gëtt där Beispill sou vill, dass, wa se an der Regierung sinn, dann annere se eeben hir Meinung, hir Iwwerzeegung iwwer Nuecht an zéien dat dann duerch. Dat kann een novollzéien, och wann een et net muss guttheeschen.

Mee d'Piraten brauchen net an d'Regierung ze goen, fir ëmzefalen! Et geet duer, dass eng Partei, déi ugetrueden ass, well se sech soi-disant wollt fir den Dateschutz, a wat weess ech alles, engagéieren, ...

► **M. Sven Clement (Piraten).**- Dir kënnt dat Wuert dach net emol buschtawéieren, Här Kartheiser!

► **M. Fernand Kartheiser (ADR).**- ... e Manuel d'emploi liesen, mat e puer techneschen Ausdréck, a scho si se begeeschtert. Dat ass keng Politik! Dat ass wierklech egal wat!

Ech wollt awer elo hei soen: De Fong vun deem, wat mer soen, dass ass extreem wichtig, well et gëtt eng Rei seriö Dateschutzproblemer. Ech wëll lech der just e puer nennen. Éischstens emol: Wat si wierklech déi technesch Méiglechkeeten? Am Abléck gëtt all Véierelstonn respektiv all Stonn ofgelies.

(Interruption par la présidence)

Mee et kann ee vill méi wäit ...

► **M. Fernand Etgen, Président.**- Här Kartheiser, Dir musst geschwënn zu enger Konklusioun kommen.

(Brouhaha)

► **M. Fernand Kartheiser (ADR).**- Kommen ech. Ech kommen, Här President, ganz séier zu enger Konklusioun.

► **Plusieurs voix.**- Sch!

► **M. Fernand Kartheiser (ADR).**- Ech wollt lech och soen, dass et ganz wichtig ass, dass mer emol kontrolléieren, wéi sécher dann déi Dateniwermëttlung ass a wat do alles der-tëscht ka geschéien, wéi déi Firmen dermat ëmginn, déi déi Date kréien! An dat gëtt an der Belsch, zum Beispill, an op anere Plaze ganz staark diskutéiert!

D'Rechter vum Konsument, den Droit d'opposition, den Droit vun Asiicht an déi Donnéeën a wéi se traitéiert ginn. Dat hei ass ganz seriö! An et geet hei ëm de Schutz vun der Privatsphär vun de Leit. An dofir sti mir zu dëser Motioun. An et sief dann, d'Regierungscoalitioun hätt hir Meinung geännert, mee soss stëmme mer dat hei elo of. Merci.

► **M. Fernand Etgen, Président.**- Merci villmools, Här Kartheiser. Ech mengen, mir kënnen elo zum Vott vun dëser Motioun kommen. Fir d'éischt déi perséinlech Stëmmen iwwert den elektronische Wee. Duerno maachen ech en Appel nominal fir de Vote par procuration. D'Ofstëmme fänkt un.

Vote sur la motion 1

De Quorum ass erreecht. Ech bieden déi, déi e Vote par procuration wëlle maachen, d'Hand an d'Luucht ze hiewen.

Appel nominal (votes par procuration)

D'Resultat vum Vott ass: 5 Jo-Stëmmen, 32 Nee-Stëmmen an 20 Abstentiounen. Domadder ass d'Motioun 1 ofgeleent.

Résultat définitif après redressement : la motion 1 est rejetée par 31 voix contre, 4 voix pour et 25 abstentions.

Ont voté oui : MM. Jeff Engelen, Gast Gibéryen (par M. Fernand Kartheiser), Fernand Kartheiser et Roy Reding (par M. Jeff Engelen).

Ont voté non : MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer (par M. Gilles Baum) ;

Mme Simone Asselborn-Bintz, M. Dan Biancalana, Mmes Tess Burton, Francine Closener (par M. Georges Engel), MM. Yves Cruchten, Mars Di Bartolomeo, Georges Engel, Claude Haagen, Mmes Cécile Hemmen et Lydia Mutsch (par M. Claude Haagen) ;

Mme Semiray Ahmedova, MM. Carlo Back, François Benoy, Mmes Djuna Bernard, Stéphanie Empain, Chantal Gary, M. Marc Hansen (par Mme Josée Lorsché), Mme Josée Lorsché et M. Charles Margue.

Se sont abstenus : Mmes Diane Adehm, Nancy Arendt épouse Kemp, MM. Emile Eicher, Félix Eischen (par Mme Nancy Arendt épouse Kemp), Paul Galles, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Georges Mischo, Mme Octavie Modert, M. Laurent Mosar, Mme Viviane Reding, MM. Gilles Roth, Marco Schank, Marc Spautz, Serge Wilmes (par M. Gilles Roth), Claude Wiseler et Michel Wolter (par Mme Martine Hansen) ;

MM. Sven Clement et Marc Goergen ;

MM. Marc Baum et David Wagner.

Domat si mer och um Enn vun der Sëtzung ukomm. D'Chamber kënnt muer de Moien um néng Auer nees zesummen.

D'Sëtzung ass opgehewen.

(La séance publique est levée à 18.56 heures.)

Le saviez-VOUS ?

PROPOSITION DE LOI

Une proposition de loi est une initiative législative émanant d'un député. De même que pour les projets de loi, l'auteur de la proposition de loi expose l'objectif de sa proposition et en commente les articles.